



# KENYATAAN MEDIA

## MENTERI PERPADUAN NEGARA

### PELAKSANAAN BACAAN LAFAZ IKRAR DALAM MAJLIS PERSIDANGAN DEWAN RAKYAT

Pelaksanaan lafaz ikrar Rukun Negara secara penuh bermula dari mukadimah akan dilaksanakan buat pertama kalinya dalam Majlis Persidangan Dewan Rakyat pada esok. Langkah bersejarah ini tidak lain dan tidak bukan bertujuan untuk **memupuk semangat perpaduan dan menghakis kebencian serta rasis dalam kalangan rakyat Malaysia.**

Dalam sebuah negara yang berbilang kaum dan budaya seperti Malaysia, **keharmonian antara rakyat adalah kunci kepada kemajuan dan kestabilan.** Oleh itu, penting bagi kita untuk **menghayati dan mengamalkan nilai-nilai yang terkandung dalam budaya Rukun Negara.** Lafaz ikrar ini adalah **langkah konkrit dalam menyatukan hati dan minda rakyat Malaysia.**

Matlamat yang jelas dalam pelaksanaan bacaan lafaz ikrar ini adalah untuk:-

- i. Memperkukuhkan Perpaduan:**  
Melalui kesedaran kolektif terhadap nilai-nilai rukun negara, kita dapat memperkukuhkan ikatan sosial antara semua lapisan masyarakat Malaysia. Ini akan membawa kepada terciptanya masyarakat yang lebih bersatu padu dan saling menghormati.
- ii. Menghakis Kebencian dan Rasisme:**  
Dengan menggalakkan pemahaman dan penghayatan terhadap kepelbagaian budaya dan kepercayaan di Malaysia, kita dapat menepis sikap kebencian dan rasisme. Melalui bacaan lafaz ikrar ini, kita menegaskan komitmen kita untuk menghormati perbezaan dan bekerjasama sebagai satu bangsa yang maju.
- iii. Pemimpin Sebagai Suri Teladan (*Role Model*):**  
Sebagai pemimpin tidak mengira politik, adalah menjadi tanggungjawab kita untuk memberi teladan yang baik dalam mengamalkan nilai-nilai perpaduan dan keharmonian. Dengan berdiri bersama dalam bacaan lafaz ikrar, kita menunjukkan kepada rakyat bahawa perpaduan adalah landasan utama untuk kejayaan negara.

Ini adalah sebahagian usaha susulan kelulusan Jemaah Menteri pada 25 Julai 2023 agar Rukun Negara dilafazkan penuh bermula mukadimah. Kementerian Perpaduan Negara telah melancarkan **Explorasi Rukun Negara** di Pusat Beli-Belah MyTown, Kompleks Seri Bintang dan Universiti Putra Malaysia bagi meningkatkan penghayatan terhadap Rukun Negara.

Saya ingin menyeru kepada semua warga Malaysia untuk bersama-sama **menyokong inisiatif ini dengan penuh semangat dan kesungguhan**. Melalui usaha bersama, kita dapat menjadikan Malaysia sebagai contoh kepada dunia dalam memupuk perpaduan dalam kepelbagaian. Marilah kita bersama-sama **melangkah ke hadapan dengan penuh keyakinan dan tekad untuk membangunkan sebuah negara yang harmoni, sejahtera, dan bertamadun** bagi semua.

Terima kasih.

- TAMAT -

**YB DATUK AARON AGO DAGANG**  
**MENTERI PERPADUAN NEGARA**  
**26 FEBRUARI 2024**